

siatangura uvucungu

maci kualialuhluva kialangulangu Miatungusu Hla'alua, nua kilaliali pariavuvutukuhlu ia, marumana ucani sikilaliali mualuvu hliahlumia uvucungu, ma kuparaiahla sitakuamia maru mumuaku paraiahla kurarau hla kilalialia, kana'a ia sikilalialia caihli uvucungu, mairahlu anuanu tahlana Hla'alua kiariari ia uvucungu. ma angahlahlana uvucungu hla siliatunuluna, kuparaiahla ahliakua rianu takualangulangua taiara, kuhlaisai angahli hlilumuka maiatuhluhu, miungu mariauvucungu hla umaai, sikuatitipa hla kilalialiana rianu umarua palisia taku'i'iaru, sipakini siaravacangu hla mavahlauvau arataisa, hlahlimililika masuisa tuahlu pakuvacuku cucutahlana, sikilaliali caihli uvucungu maru ualu sikiamia, hlimususua: kilalialia umasasapa, umaurapu, muaumuma, mariapucu, apikaunga, mavavaru, mariatumuhlu hla muruacuka.

umasasapa ia, uakikirimia hlamamana, asasapana hla umala hlalungu takipuu'a iaukuta asasapana, kani'i ia sipatakuacahlia cucu'u usumanu marucua umasasapaisa, uapapalucu saliri mavacangu ia, acahlicu umasasapa, umurapu ia hlamama salia mahlava sulivucungu nua mapaci, mahlukua taruarapana pakiau pitamu ruamiacu tarurapu, apahlaapa pataluluvu cuculikanana takulusu taku'i'iaru, kuhlaisai kani'i alupaliavaluna, maci talulupungu ia, uapapacu usahlu pukua vavarara, kilaliali muaumumacu mahlitarurapicu ma aatu mariapucuna, takuamia kani'i ia ahlahlaina muasa mumumahla, hlitakumiana tumua umauhlunu alamuru ahlaina apahlimu ahlamu, kani'i pasamia muasacua hlahlahlusana mahlukua sakurahu parivutukuhlu sipapuhlaisa aanuisa, maci mariapucucu pakiaturucua palunguna, sitakuamiaisaisa maria uvucunguna, ma mariauvucungu mualualu aari ia matialangicu hliarihlipia racu'u hla

rahlungu taruvuka, arisa ruavicicua hlamamana laulauvuisa hla mahlava aruamiasa mapaci mahlukua uvuvucungua, kilaliali 'ihlicu langica hla 'ihlicu sasaruanana pitamu, hla umahlukua hlakana'ana malitunulu sia' u' uraisamana mii.

hliputunganuacua uvucungu ia kiacunguhluu matasaku apikaunga, apialangu imaru hlicuhluu mapaci hla ahlu'aiu hliapiamuhluu cahlu'u, maripucua hlilumulumuka asavungana hla imaru hlicuhluu mapaci, pavuhluvuhluu makukuacu 'uluvu maru vahlita kilaliali, kilupungu ia, alucisa palungu pihlingina nua usumanuisa, acacani iravaru pahlumuhluu ru'avatu risaku, ruvanaisa kana'a, kilalialicu mavavaru arisa kulupungu kumamahlipapu, misasumu tahliaria makiahluhlucua hlimatasaku pihlingina, 'uluvu marikua salia kilaliali mavavarua kilupungu, paaucu 'uluvu hliarivarua uvucungu, maitativaua 'uluvuna maini tangusuhlu makuhlahluahluu hla kilaliali, macua imaru mapaci tangusuhlu ia, apahlavuisa 'uluvunaka hlaka liuhluisa. mualavalavau usia vulahluna, kiakucucua cucutahlana miararumana kitaisa apikaungana kialulupingicua sikilaliali ucani caihlina, sikialavalavau kilaliali ia muruacukacu, tarisiacupucupingicua aucaucani pihlingina musa murucuka.

manikika sikilaliali Apikaunga Hla'alua, ku ausi sikilaliali Miatungusuna masasangaru, hla macua Apikaungana ia sikiapalisia 'ihlicu langica marucua kilalialia mariauvucunguna, inicikika cucutahlana tuahlu muhlusuhlusuka siangusipi, mahlulusu hlitakacihli tumangurana.

(文章大意 僅供參考) ※字數限 200 字

小米的一生

拉阿魯哇除了有聖貝祭、捕魚祭之外，還有小米的歲時祭儀。過去主要食物就是小米，在經濟、宗教，不同面向都扮演了很重要的角色，從種植、照顧，乃至於收割、儲存，都有嚴謹的儀式動作需要執行，以求小米可以很順利、很平安的成長，並且結果豐富，餵飽族人。

小米的歲時祭儀共有八項儀式，分別為：開墾祭、播種祭、除草祭、收穫祭、進倉祭、祖靈嚐新祭、小米豐收祭與狩獵祭。小米歲時祭儀，不像聖貝祭那麼熱鬧，可是小米的歲時祭儀也一樣嚴謹，有著嚴謹的小米歲時祭儀，使得族人們可以延續生命，與自然和平共處。